

劉兆祐博士主編
中國史學叢書三編

雲
間
志
畧
(四)

臺灣學堂書局印行

劉兆祐博士主編
中國史學叢書三編

雲
間
志
畧
(三)

臺灣學生書局 印行

司俟病痊之日擢用而未幾且卒夫以公之賢遲暮
始達而其宦止二千石亦不甚顯其壽僅五十九亦
不甚長則豈非天哉公未第時有友人蒼頭持蓋立
而公倉卒自外至觸之折其兩齒友人方駭責蒼頭
而公無幾微見于顏色曰此吾自不慎以致此非使
者罪也又公赴試南都館人有少婦盛飾以挑公者
公罵却之明日卽移館舍以避嗚呼觀人者必于其
喜愠於其隱微此可以占公盛德而槩公生平矣公
之子汝讓欽之以文章行誼名而竟賁志以歿其嗣
孫彥臣登萬曆戊午鄉薦方待 詔春官繼公芳躅

亦公盛德之報云

何翰林兄弟傳

何良俊字元朗號柘湖弟良傳字叔皮號大壑華亭人兄弟先後舉孝廉才名等埒所謂哲軌齊驅英標競爽者故世稱兩何云元朗綺歲從經師游卽厭薄舉業獨耽嗜古文博綜子史士紳輩不能難所不知亦復高視濶步而竟以數奇拔貢太學時宰憐其才授南翰林孔目蓋重公也地旣清華官復閒散嘗出遊鍾山燕磯載咏載觴而仕宦自六卿以下皆破格敬禮之公亦不以屑意常歎曰令我守茂陵之園索長安之米亦足浮沈乎甫滿考卽謝官歸矣而猶眷

眷秣陵且營別業及桑梓爲烽火所殘海波所蕩一意卜居避兵開杜甫之草堂築羅含之精舍與弟祠部公同時高蹈而問字乞言之客塞巷闔門雞林誦居易之蒲鳳館吟昌齡之句卽以方公奚讓焉寇退還里日惟嘯傲泉石放浪烟霞而晚歲又以聲伎爲娛常張筵設席烹肥擊鮮與賓客故人爲杯酌歡輒至達旦非公自奉過奢第負許大才而不得致位通顯亦多牢騷不平聊用遣適耳公嘗儲良藥與人又釀佳酒飲客或曰子無病而多蓄藥不飲而多置酒勞已以爲人何也公笑曰病者得藥吾爲之體輕飲

者濡酒吾爲之酣適蓋專以自爲也豈爲人哉公文
法向遷詩宗蘇李近體出高岑間卽陸與吉朱象玄
兩太史公兄事之彌謹其他後輩得入其堂輒自喜
以爲登龍門焉居恒燕息處各四友齋四友者莊生
摩詰樂天與公而爲四也公自爲記及書屏示客與
趙中丞王左輔兩書皆生平寶錄所刻有何氏語林
何翰林集四友齋叢說其未鋟之板者不能殫述云
叔皮領嘉靖庚子鄉薦舉辛丑進士筮仕行人司行
人兩使宗藩皆以式禮不辱而其擢刑部主政也又
以儒飾治讞訟多平比公乞改南儀部陞祠祭卽則

又恪守章程刷靡振敝凡祠祭所隸動關勢家公欲
裁之而有大吏阻撓者公歎曰不有周任陳力之戒
乎遂抗疏陳乞投紱言歸其歸也優游處休超然物
表鳴琴散帙對酒高歌時與伯氏元朗同飲食起居
縻戀而不能已已兩兄弟騷雅風流垂老一轍士論
賢之公弱冠多羸疾一日沉疴若絕舉家悲號夫人
宋氏意公必死矣遂自經于祠堂旦日公復甦詫曰
吾夢夫人來代我我乃還今夫人何在亟索之則在
祠堂夾室公痛幾絕遂不再娶者終其身久之乃兄
以無後切責祠部不欲傷兄心勉畜一妾後生一男

以延何氏一綫之脉其義節良足嘉尚也余因傳翰
林而及祠部并以祠部夫婦事紀之如左若其人氣
稟中和體含溫粹見者若游清平之野而覩鸞鳳之
儀誠有如石城許公所稱者而莫方伯中江亦稱公
行誼雅馴韻宇夷曠托佛老以逃名跡假麴蘖以寄
沉冥公之雅致可覩于斯矣所著何禮部集詩則條
暢舒徐文亦婉麗秀潤綽有漢度唐風叔皮聲價亦
豈遠出元朗下哉斯亦吾宗之二傑士也

--	--	--	--	--	--

唐上猶次梁公傳

唐堯賓字舜友別號次梁華亭人公生而少孤多羸疾四歲始得成步而其志氣則已儼如成人乃祖素庵公遣之就學甫三四月卽辭歸謂同學者無遠志不足與遊也素庵公因另擇賢師傅之而公亦從此自奮能文章矣適里人有以重役誣陷素庵海上曹令遣人勾攝之素庵懼不敢出公曰無恐第往白之遂與乃祖偕至縣侃侃陳詞令試之以文援筆立應令奇之役遂豁自是乃祖得優游以終天年其執祖喪也至哀而其事祖母也亦至孝有朱翁饒于財欲

贅公爲婿公以遠離慈闈爲憂意不欲就祖母固強之乃就因讀書蕭寺中下帷憤發一試而補博士弟子貢郡守熊公奇公才試輒冠其儕輩諸弟子執贅而願從游者此時屢已滿戶外矣會婦翁家殿一無賴至鉅恐逮獄悉以重貲攜入公家公弗瞬也急馳視之其人胸前幸微煖卽灌以藥復舁之歸徹兩晝夜環侍得復蘓且力爲之幹旋事乃得白已而盡歸重貲以還婦翁分毫不染斯不亦人情所難也乎庚寅冬督學使者丘公集齋鑒賞公卷謂爲江南第一拔貢明年上春官復首部試太宰許公延譽之

諸縉紳間名震館閣首揆未齋顧文康公詣旅邸欲
留之西席介吾鄉孫文簡爲言公以祖母年邁懇辭
文康贈之甚厚公俱謝不受也由是名益蔚起而嗣
後再試不第一日比行毋夫人泣謂曰吾頭顱盡白
矣汝尚服章縫異日卽第弗及見矣公遂感泣去而
謁選天官分教浙之平陽首倡道學士子彬彬向風
舊習爲之一變學道張公淨峰以公爲賢優獎之爲
增廣科舉而代巡觀風決科之試哀然舉首者卽平
陽士也時山寇內侵邑宰張倉皇無以爲計公畫策
佐平之當道自公經濟薦剡屢上而會祖母憂去任

矣方公祖母之病也日夜視湯藥卽上官至亦不出迎而且焚香籲天願以身代及執祖母之喪嘔血數升幾不能起而嚶嚶作孺慕者三年慈烏之群集其家亦公孝感所致耳服闋補任莆陽莆故多才地而士子爲文多所剽竊公力爲之釐正犁然有歐陽復古之風大宗伯古林何公時按閩試先生於諸士中有滄海遺珠之歎歲苦旱斗粟百錢小民嗷嗷待哺郡守就公問計公爲陳說諭諸富室貸銀借粟若干饑民全活者以萬數卽富鄭公之於青州趙清獻之于東浙與公何以異哉事載廖郡守賦中奏最擢教

南海公捧檄喜曰此白沙講道之鄉也吾志其在是乎至則日與甘泉湛公泰泉王公以古人相期以道學相切劑而前後學憲張蔡兩公與公結忘分交時命駕至學宮中自朝至夕而返夫以上官而敬禮下僚非公有以感動之不至此是秋登薦倍于往額而魁南粵者亦公所鑒賞士也又捐俸新魁星樓立題名記剏射圃樹杏壇則黃門蘓見江都憲李三洲之記文可稽者郡守曹沙溪初與公落落不甚相知偶以小忿忤上官被論繫獄公率諸生力爲營救乃解郡侯流涕爲謝稱公長者長者云栢臺高其行委署

東莞而公懇辭不赴當道以此益重公力薦于朝至
於割俸而賻鄉人之櫬讓符以卹僚友之喪此又其
行誼表表者也居無何而轉教授泉州瀕行士子送
之渡海中流忽遭颶風人人五色無主相向涕流而
公端坐不動惟口生寄歿歸一言已而風恬幸無恙
非公篤行通于神明有此耶既抵泉與士子課文較
藝復講學于浩然堂士有才而貧者輒捐貲助之有
受人侮被人中傷者陰爲救釋之不欲令人德亦不
欲令人知也學道屬公廉行劣生而公獨舉行優數
人客詰之公曰吾輩豈容以風聞玷人一生名行乎

言者愧服而學道于行劣生俱從薄治亦公有以感之也他如闢青雲路構夫子泉起尊經閣詳具大叅王遵巖修學碑記中若其曰之當道表吳氏之貞節舉鄉達顧公新山張公淨峰之鄉賢則又闡發幽潛有裨世風不小者而一日登青源山見白氣亘天知爲兵象且夢塚尸出奔恐有意外之變惓惓爲守土者言之而猶未之信也不久海寇猖獗泉南震搖衆始服公先見徒付之一歎而已無何拜江西上猶令猶故土瘠民貧而盜賊多窟穴其中最號難治公至則汰冗費新學宮繕城隍立保甲而又沿鄉設約召